

# Jaring pancing ketam jadi rezeki sekeluarga

UM 27/02/24 MIS 30

**KLANG:** Siapa sangka hasil kreativiti membuat jaring pancing ketam kini menjadi punca rezeki sebuah keluarga sejak dua tahun yang lalu.

Menurut usahawannya dari Taman Sungai Kapar Indah Klang, Anuar Majid, perniagaan kecil-kecilan menjual jaring pancing ketam tersebut bermula dengan minatnya memancing ketam dengan menggunakan jaring pukot ikan talapia pada tahun 2015.

“Hasil inovasi sendiri dan saudara-mara saya belajar menjahit pukot khusus untuk menangkap ketam yang lebih tinggi hasilnya berbanding menggunakan jaring talapia.

“Tambahan pula jaring talapia cepat rosak jika selalu digunakan berbanding jaring memancing ketam yang saya buat sendiri,” katanya kepada *Utusan Malaysia*.

Bapa berusia 44 tahun itu memberitahu, dia nekad berhenti kerja daripada sebuah syarikat kenderaan di Klang dua

tahun lalu bagi membolehkan produk jaring pancing ketam hasil tangannya dikomersialkan.

Menurutnya, isterinya, Nor Farazuin Yaacob, 41, bersama tiga anaknya yang berumur antara 10 hingga 16 membantu kerjanya menyiapkan tempahan jaring pancing ketam tersebut.

“Setiap orang mempunyai kemahiran masing-masing. Isteri saya bahagian memotong jaring, anak-anak mengambil tugas menyulam dan saya mengait jaring.

“Alhamdulillah produk yang saya dan isteri serta anak-anak hasilkan kini menjadi rezeki keluarga saya,” katanya.

Mengulas mengenai harga jaring pancing ketam tersebut beliau berkata, ia adalah antara RM8 hingga RM16 mengikut saiz.

Sebarang pesanan dan maklumat berkaitan produk unik tersebut, netizen boleh merujuk media sosial miliknya, <https://www.facebook.com/anuar.bunohan>.



**ANUAR Majid menunjukkan hasil tangkapan menggunakan jaring pancing ketam yang dihasilkan dengan kerjasama isteri dan anak-anaknya. - UTUSAN / ABDUL RAZAK IDRIS**